

西方確指

普爲出資及讀誦受持展轉流通者

同向偈曰

願以此功德

消除宿現業

增長諸福慧

圓成勝善根

所有刀兵劫

及與飢饉等

悉皆盡滅除

人各習禮讓

一切出資者

展轉流通者

現眷咸安樂

先亡獲超昇

風雨常調順

人民悉康甯

法界諸含識

同證無上道

民國二十年一月再版二千部

◎西方確指一冊◎

(流通處)

佛教淨業社流通部

上海赫德路十九號
電話三四三二〇號

(印刷處)

國光印書局

上海新大沽路六七一號
電話三三七四三號

(藏版處)

佛教淨業社流通部

印光法師曰。一切佛經。及闡揚佛法諸書。皆令人趨吉避凶。
改過遷善。明三世之因果。識本具之佛性。出生死之苦海。生
極樂之蓮邦。讀者須生感恩心。作難遭想。潔手淨案。主敬存
誠。如面佛天。如臨師保。則無邊利益。自可親得。若肆無忌憚。
任意褻瀆。及固執管見。妄生謗毀。則罪過彌天。苦報無盡矣。

西方確指序

丁未夏。過雪山和尚方丈。和尚出一書。授余曰。此寶筏也。且緣起甚奇。明末時。吳城八友。同修玄門。日請乩仙。以談其術。於卒也。有仙至。所談與諸仙異。因日事之。甚狎熟。久之。忽勸以念佛。衆問念佛可乎。曰。善。衆皆稱南無佛。曰。不如是念也。衆問如何。曰。汝須合掌。至心向西頂禮。念南無阿彌陀佛。衆從之。于是爲之微細開示念佛法門。令捨僞歸眞。求生極樂。始宣示夙昔因緣。菩薩名號。及現異香。天花種種靈瑞。而八人者。皆反其邪修。歸于正信。無朽者。八人中之師也。菩薩令往三昧。和尚處受毘尼。圓僧相。和尚始難之。既而見菩薩月偈。遂敬禮西方。爲之剃度。蓋菩薩始至時。衆以爲仙。指月爲題。求句。因示以偈曰。一月光含千世界。分身無量照羣迷。當知本體原無二。不動莊嚴變化機。始於明崇禎癸未五月二十八日。迄清順治丁亥十月初二日。前後共二十四會。所說皆修行要妙。因偈中有確指正修路句。遂名之曰西方確指。余讀之。身心踴躍。不啻醍醐之滴入焦腸也。因歎奇不已。和尚曰。余始亦不之信。既而閱之神采煥發。卽欲不信而不能矣。余曰。菩薩往昔因中。與八人具有大緣。

悲念深。故權巧接引。此豈同於應。凡之流。且觀菩薩臨行。有曰。鸞凡之設。本爲神鬼。依憑。非大菩薩應化常事。則是書也。豈可作凡書視耶。按覺明妙行菩薩事迹。與哆菩薩應化事迹一文。余時卽願刊布流通。廣利羣有。而因緣未到。迄今己酉春。僧俗道侶。無不踴躍歡喜。願施貲助成。至有讀而哭。哭而讀。頓舍所愛室宇衣服器具。入深山念佛者。豈非菩薩以無緣慈。攝化衆生。不可思議乎。遂與靈曦慧楫二老師。謀付諸梓。梓成。道其始末如此。時康熙己酉九月既望。古吳淨業弟子朗西金鶚撰。

金鶚序

印光法師校訂西方確指

彭紹升後序

哆婆娑訶菩薩應化事迹

淨業知津

勸修真信切願一心念佛文

目次

西方確指

覺明妙行菩薩說

菩薩戒弟子常攝集

△一時菩薩自極樂國來降於娑婆震旦古句吳地在會弟子以往昔因緣得蒙化度。菩薩將顯淨土法門而說偈言。

諸佛之法要 微密不思議 以非思議故 無能盡宣說 牟尼大慈父
悲憫衆生者 說所不能說 導彼今後世 更以異方便 顯示安樂刹
令發願往生 橫截諸惡趣 由佛阿彌陀 大願攝羣品 聞名能受持
決定生無惑 若有大力人 專念心常一 成就深三昧 現前亦見佛
今我如佛教 將開化導門 念爾等迷倒 確指正修路 是非弱小緣
應具難遭想 西方萬億程 一念信卽是

菩薩說偈已。令諸弟子朗宣一遍。復言。汝等向來學宗玄術。心溺邪修。我以夙緣慈念深故。來此化導。今已首標西方淨土。爲正向正修一門。猶慮未能極信。次當說我

名號及我所證。令知說是法者是大菩薩。善男子。我昔因中。以妙湛覺心。照明一切諸所有刹土。衆生所同具足。卽以覺妙妙覺。覺明妙心。起無量妙行。度諸衆生。是故阿彌陀佛。印我名號。號曰覺明妙行。汝等從此皈依。更無疑二。時同會者八人。俱合掌至心。念南無覺明妙行菩薩。散禮而起。菩薩曰。善哉。如是。

△或問持經呪之法。菩薩曰。所謂持經呪者。自持其心也。要在直明心地。若止云持得熟。誦得多。又念某經某呪某佛。謂我有大功德。而不能句句銷歸自性。又不能深解如來妙諦。謂可以獲果證者。不見十字路口。若無眼。若無足。若乞婦。若乞男。終日不住口念到夜。計其所持。一歲何啻數十萬遍。究竟是殘疾者求乞者。並不會證得一毫果在。此何以故。只無解無行故耳。故知持是經。卽當依是經而修行。又發大願。或求生佛國。或求明心地。或發大智慧。或利濟衆生。俱仗如來廣大弘通之力。以成就行人之願。如是方爲持經持呪念佛。

△天然老僧。以久病不愈。欲入徑山待死。投骨普同塔中。菩薩曰。汝欲住山待死。是無事討事耳。汝愁幾根老骨頭沒處安頓耶。不知眼光落地。直伸兩腳。任他刀砍斧

斫火燒水浸。與爾無干。乃爲他作久遠計。亦太愚矣。且此身生時。尙是無益。何況死後。汝今宜簡省諸事。單持一句阿彌陀佛。念念不捨。阿彌陀佛。便與汝爲好伴侶。大限到時。現身接引。得生極樂。豈不愈入山待死耶。又生老病死。是世間難免之苦。汝卽久病。亦莫管他。愈不愈。但一心念佛。生也由他。死也由他便了。

△僧不二。將投師受戒。菩薩曰。惜哉惜哉。堂堂相貌。表表儀形。不知自反。計其所作。與俗人無異。吾見汝身在此處。而神遊地獄矣。急宜痛加修省。斷惡遵善。上求佛果。下化羣生。不可昏昏昧昧。失此有限光陰。自貽萬劫之累。至受戒一事。不受則已。若一受。更不得分毫毀犯。當守護清淨。如白璧明珠。了無瑕玷。斯成戒品。蓋戒爲三世諸佛入道根本。勿同兒戲。又若住靜參方。更宜親近善友。遠諸庸劣。親善則道業易成。近惡則戒行易失。此二語。終身學道之要。慎之記之。

△馬永錫兄弟。夙世爲獵戶。一日入山。共殺一鹿。當獲短命報。又嘗見塔中佛像。仆地扶起安座。禮拜而出。以善因故。再得人身。菩薩先爲永錫開示已。永錫懼求永年之道。菩薩曰。昔北方妙覺寺。有童子沙彌。年十六時。有一相師。說人生死不爽毫髮。

謂沙彌言。汝年十八。季秋當死。沙彌恐甚。夜禱於佛。願於藏中賜經一卷。終身受持。以祈長壽。言已。悲泣不勝。再拜而起。於大藏中。隨手取得金剛般若經。遂書寫受持。曉夜無懈。兼持戒精嚴。了悟玄理。年未四十。道風流播。四衆歸仰。後至八十坐化。卽洛陽微行禪師也。爲唐玄宗開元六年事。我所親見。汝今旣怖短命。欲求永命。當依此沙彌求金剛善本。發心書寫。勤行讀誦。復求解義趣。此內功德也。從今日始。不得更殺物命。當愛如己身。又多積陰德。此外功德也。內外俱修。功德甚大。自能與天合體。而夭壽不二之理立矣。何慮年壽之不永乎。然須慎終如始。如彼沙彌八十而不忘。方爲合道。切莫有頭無尾。或行十日半月。一年兩歲。便丟手了也。若果盡形遵奉。先後無間。不遂所求。諸佛及我俱墮妄語。

△菩薩示陳定崑曰。汝父子奉行我教。最爲難得。但必持志久遠。不得便生感應希求之念。將修行二字。正如日用間穿衣喫飯之事方可。

△菩薩示查定宏母曰。汝夙有向道之念。而未遇正人。深爲可憫。今當爲汝分別開示。汝往昔爲比丘時。力行精進。晝夜不怠。心猛烈故。於靜定中。忽起一見。云我何故

不能速得成佛。又一日。聞諸佛無相。卽心是佛之語。復益邪思。云既諸法空寂。我心是佛。何用修習。不知此爲究竟空理。而非初入法界所易言者。比邱從此竟墮邪見。不復進修。自謂已證大道。所以從迷入迷。沈淪長夜。悲哉衆生。求道不遇眞善知識。未免陷於羅網。不可不慎。汝今當知。由昔以見邪故。報獲五漏。失正知故。復遇邪師。毒螫親遭。豈得不生恐怖。今應速發正信。至心憶念阿彌陀佛。求生極樂國土。

△無朽爲一友問。得壽幾何。菩薩示偈曰。

人命如朝露。虛浮無定期。未能逃夢幻。何必預求知。

復示曰。且莫爲他問日期。到臘月三十日。管取手忙脚亂在。

是友果以次年臘月三十日疾終。

無朽

聞說。遂求開示。菩薩曰。元柏當知。學道而不明此心。譬如造屋無基。渡水無筏。欲明心者。當微細觀究。此身此心。從何而有。既四大虛幻。心將誰寄。身心既幻。世界微塵。了無差別。目前萬法。從何處生。從何處滅。若無生滅。則能照所照。兩無所依。自見眞如寂滅場地。

△句曲孔生。持齋二十年矣。自念衰老。問死後云何。因泣下不已。菩薩曰。不須悲淚。

但從我說。深信遵行。自有好處安身在。遂授偈曰。

西方有淨土。人天皆所依。汝能修此門。安隱無驚疑。

△沈文州以傷寒名家。適至作禮。菩薩問曰。寒入心包。當作何病。答曰。名中寒。因喻諸人曰。汝等但知寒入心包。名曰中寒之疾。若邪入於心。卽爲殞命之病矣。汝諸人但以身病爲病。調之治之。至於心有大病。則不問明醫。不求妙藥。任其患苦而莫之覺。哀哉。

△陳大心奉教念佛。極其誠至。菩薩示偈曰。

八德池中蓮已種。果然一念甚宏深。滋培雖藉如來力。長養全憑決定心。

又喻諸人曰。此土有發願往生者。彼土卽生蓮花。故作是語。汝等應生深信。

△孫中白好丹術。日久無效。因來會作禮。菩薩呵曰。老禿今日換這副嘴臉。見我麼。且問爾金丹幾時可成。答曰。正爾求成。菩薩曰。若成了。千萬留卻幾顆。莫都喫到肚子裏去。俟汝見閻羅老子時。好做些人事送送。癡老兒。此事決無你分。不如做你本等去。孫拜謝。有頃。菩薩又曰。癡老兒。知得你自己本等麼。答曰。我求見性。是我本等。

菩薩曰。汝知此性。爲大爲小。爲青爲黃。答曰。性無如是等相。菩薩曰。然則汝欲向甚處求見。孫無語。乃發信皈依。願爲弟子。求示法名。遂示以偈曰。

性無大小青黃相

那有聲名任汝呼

不達此中玄妙處

一言半字總淆訛

我今強爲汝立名。可曰達本。汝此後光陰。不上七八年矣。莫負卻八百年前三十六載苦行也。孫因問此身如何結局。菩薩曰。結局便結局。又問如何結局耶。孫乃問如何修持。菩薩曰。淨土一門。能廣攝羣品。汝問修持。當念阿彌陀佛。發願往生。便得了一百了。汝無再惑。

△菩薩又喻諸人曰。從古大聖大賢闡微立教。皆至精至簡。上士聞而悟。中下聞而修。皆歸大道。乃後之著述。務爲繁言隱說。使凡流揣摩成見。遂至以訛傳訛。深入邪僻。抱暗沒世。竟不自覺。如達本因讀參同悟真諸書。不知法要。曲信訛傳。謂爲有得。執吝不捨。白首無成。動諸煩惱。菩薩說爲真可憫者。是故汝等既識前非。當崇正信。△一時菩薩將臨法會。弟子八人。無朽常攝常源。定茂達本。查定宏。陳定崑。查定敏。恭謹顙竚。齊唱佛號。忽聞異香。從空中來。衆皆歡喜。得未曾有。菩薩曰。善哉善哉。爾

等知今日之會。有夙因否。昔梁武皇天監六年。我出家於北魏之東都淨因寺。爲大比邱。因避亂南遊。住錫雞鳴山麓。時爾八人依我修學。不久以兵亂各散。我越後二載。示寂於武林天竺。後復於唐僖宗朝。爲清河獻王長子。亦棄位出家。今爾八人同會念佛。亦由我發心。正如往昔無異。但爾等去我以來。八百餘年矣。仍復飄流未反。眞爲可悲。眞爲可痛。今爲汝等重加發明所修行業。令速成辦。早登解脫。宜各諦聽。

△示無朽曰。汝向者雖從事玄門。而能恭敬諸佛。當知卽是夙因。今宜速發深心。精修淨業。爲諸人倡導。無空擲後此一十三年光景也。付汝偈言。

八百年前有勝緣。今來相遇指青天。已知本地中秋月。莫向長江覓渡船。

△示常攝曰。汝常持大悲神呪。云何而持。答曰。所持之呪。歷歷分明。能持之心。了不可得。菩薩曰。能如是持。是名眞持。有偈囑汝。

汝持大悲咒。應識大悲心。離名亦離相。以此度羣生。

△示常源曰。汝旣出家。要須謙下柔和。敬事師長。虛己請益。增長志氣。莫只坐雲霧中過日。源不達。復示曰。汝悽悽若此。可曉得自己的心麼。源無語。乃令誦準提呪一

徧源隨誦之菩薩曰。此不是你心。喚作甚麼。偈曰。

見初無心。卽汝本心。準提一徧。全體分明。

△示定茂曰。汝持準提呪。平日須要細密用心。觀一切境。若喧若寂。若物非物。若欣若厭。無非此呪現體。卽我妙心。刻刻流露。如是奉持。必獲果證。我亦以神力助汝成就。當誦我偈。

兩行祕密。卽汝本心。莫謂法少。是法甚深。

△問達本曰。汝將云何。答曰。欲明心。菩薩曰。得無口頭話否。當勤念佛。其功十倍。亦示汝偈。

心外無佛。佛卽汝心。深信不惑。一念無生。

△示查定宏曰。汝持金剛般若。當知有七不持。所謂心昏散不持。有過犯不持。入不淨處後不持。飲酒後不持。人擾不清淨不持。有事將作未作不持。心別有記憶不持。若堅意受持。應離此七。誦至純熟。卽於觀心中持之。果能如是。則功德不可思議。果報不可思議。佛有誠言。汝須保任。復與汝偈。

般若一經 功德無盡 拔妄想根 脫生死病

△示陳定崙曰。小人之爲惡也。惟恐人知。君子之爲善也。亦惟恐人知。汝當以君子慎道之心。而作佛事。更有偈曰。

勿貴人知 勿希天應 恆一其心 必堅必正

△示查定敏曰。汝未及弱冠。已知向道。可驗夙因。今爲汝命名曰敏。敏有聰勤妙捷四義。聰以除汝暗。勤以勵汝怠。妙以開汝慧。捷以發汝廢。汝當顧名思義。莫謂菩薩徒與爾一箇字也。復示汝偈。

汝年正幼 當學孝弟 以是持身 毋惰其志

△是日陳大心後至。菩薩問曰。汝云何修持。答云。惟修淨土。菩薩曰。捨此別無勝門矣。囑汝一偈。

道無他說 唯心而已 蓮胎始成 專精勿二

△菩薩曰。所示淨土一門。眞諸佛心宗。人天徑路。今汝等雖求往生。若發願不切。如入海而不獲寶珠。徒勞無益也。我昔於晉明帝時。受貧子身。爲貧苦故。乃發大願云。

我以夙業。受此苦報。若我今日不得見阿彌陀佛。生極樂國。成就一切功德者。縱令喪身。終不退息。誓已。七日七夜。專精憶念。便得心開。見阿彌陀佛。相好光明。徧十方世界。我于佛前。親蒙授記。後至七十五而坐脫。竟生極樂。後以度生願重。再來此土。隨方顯化。或爲比丘。或爲居士。或爲國王。或爲臣宰。或爲女人。或爲屠勾。或隱或顯。或順或逆。皆隨順說法。導諸羣品。又以仙道多未悟真常。耽長壽樂。不思進修。我現仙身。救其迷墜。如唐僖宗朝一事也。今則又爲汝等發明邪正。闡揚淨土。汝等當一意一心。堅修此門。必不相誤。若心志一堅。又不待隔世而生。現前亦得見佛。如我昔年無異。有偈四句。

少說一句話 多念一句佛 打得念頭死 許汝法身活

△或問。學人云。何得離塵欲。得無障礙。菩薩曰。我將由小而推之大。由外而推之內。汝等當善解其義。有人於此。無故而奪汝一錢。動瞋恨否。答以一錢雖微。見奪則瞋。又無故而與汝一錢。生喜悅否。曰。一錢雖微。見與則喜。有答以一錢甚微。與何足喜。奪無可瞋者。菩薩曰。汝能如是。心之清淨久矣。何至今日尙沈濁垢耶。汝等當知學

人洗心不密。見有見無。處處是著。念念皆貪。所以業識紛馳。無暫停止。卽念一句阿彌陀佛。心想依然外遊。未能頃刻歸一。良由汝等於無量劫來。未嘗發一時一日遠離塵欲之心。故此塵欲亦從無始劫來。未嘗一時一日肯離汝心。身纏心縛。深入塵網。那得如蓮花出淤泥而不染。故知欲斷貪著。先從一錢之與奪。作棄捨觀。作非我有觀。奪不起瞋。與不起悅。如是乃至百千萬錢。乃至億億萬錢。乃至國城妻子。乃至身肉骨髓。乃至過現未來心意意識。乃至生死業報菩提涅槃。一切皆如此一錢之與奪無異。自然習漏消亡。障緣永滅。漸履清淨。成就道品。汝等當依此修行。勿更自虞窒礙。

△孟冬二日。爲菩薩誕生之辰。衆設供稱壽。菩薩曰。汝等以何物壽我。皆曰。心以爲供。菩薩曰。心是何物。可以持供。答曰。唯一至誠。本は無物。菩薩曰。旣言無物。誰知至誠。能知誠者。定有處所。可得舉示。云何無物。答曰。實無所得。菩薩曰。汝言無得。爲是暫無。爲決定無。衆擬議未對。菩薩曰。無則決定無。有則決定有一。涉纖疑。毫釐千里。當知汝等言誠言妄。說有道無。皆是起滅計較推詳卜度之心。以是祝我。均無所益。